



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu 2015
Tribunál Distritál Suai
Juñu 2015

**Sumáriu prosesu julgamentu kazu iha Tribunál Distritál Suai -
Períódu Juñu 2015**

Introdusaun

Iha fulan Juñu 2015, JSMP monitoriza kazu 15 ne'ebé julga iha Tribunál Distritál Suai (TDS). Aliende kazu hirak ne'e, Tribunál Distritál Suai mós julga kazu 27 seluk liuhosi tribunál movél iha Distritu Ainaro, maibe JSMP la bele partisipa tanba involve iha atividade seluk iha Dili.

Kazu hirak ne'e involve krime violénsia bazeia ba jéneru 7 no restu involve krime sira seluk. Krime violénsia bazeia ba jéneru sira ne'e inklui violénsia doméstika 5, abuzu seksuál ba menór 1 no krime koasaun seksuál 1. Enkuantu krime sira seluk involve omisídiu simples 1, danu simples no ameasa 1, ofensa ba integridade ba fízika simples 2, krime kontra bandu 1, krime ameasa 1, no tentativa omisídiu 1.

Entre kazu 15 ne'e, tribunál konklui ona prosesu ba kazu hamutuk 12 no kazu 3 sei iha prosesu nia laran.

Tuir mai deskripsaun sumáriu julgamentu ba kazu kompletu:

1. Kazu krime ofensa ba integridade fízika simples -Nú. Prosesu: 90/pen/2015/TDS

| | |
|----------------------|-----------------------------|
| Kompozisaun Tribunál | : Singular |
| Juis | : Dr. Argentino Luisa Nunes |
| Ministériu Públiku | : Dr. Mateus Nessi |
| Defeza | : Dr. João H. De Carvalho |
| Konkluzoan | : Omologa |

Iha 09 Juñu 2015, Tribunál Distritál Suai prezide julgamentu konsiliaun ba kazu ofensa ba integridade fízika simples ne'ebé involve arguidu SG, JMLDC, ho FCG hasoru RAdA. Kazu ne'e akontese iha Debos, Distritu Covalima.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

Iha prosesu konsiliaun ne'e, arguidu sira konfesa faktu sira iha akuzasaun no husu diskulpa ba lezadu no promote katak sei la repete iha futuru. Tanba ne'e lezadu perdua arguidu sira no deziste tiha prosesu ne'e.

Bazeia ba akordu hosi parte sira no pedidu dezistencia hosi lezadu, tribunál konklui no omologa prosesu ne'e.

2. Kazu krime ofensa ba integridade ba física simples ho natureza violénsia doméstika - Nú. Prosesu : 103/pen/2015/TDS

Kompozisaun Tribunál : Singulár
Juis : Dr. Samuel Pacheco (estajiáriu)
Ministériu Públiku : Dr. Mateus Nessi
Defeza : Dr. Manuel Amaral
Konkluzau : Kondena ho pena prizaun fulan 1 suspende ba tinan 1

Iha 09 Juñu 2015, Tribunál Distritál Suai, prejide leitura sentensa no kondena arguidu IdS ho pena prizaun fulan 1 suspende ba tinan 1 tanba provadu komete krime ofensa ba integridade física simples hasoru nia feen, iha 06 Outubru 2014, iha Distritu Covalima.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 alinea (b) Lei Kontra Violénsia Doméstika.

Iha julgamentu arguidu konfesa totalmente faktus sira iha akuzasaun. Arguidu deklara katak, kazu ne'e akontese tanba de'it lezada hase arguidu atu labele hemu tua no arguidu la-simu no baku lezada. Enkuantu, lezada mós kontinua konfirma faktu sira ne'e, no deklara katak nia perdua ona arguidu, no sira hela hamutuk ona nu'udar feen ho laen hanesan bai-bain no nunka mosu problema to'o agora.

Iha alegasaun finál, ministériu públiku husu ba tribunál atu aplika pena prizaun fulan 3 suspende ba tinan 1, tanba provadu prátika violénsia hasoru nia feen.

Enkuantu, defeza husu ba tribunál atu aplika pena suspensaun ba arguidu tanba arguidu no lezada di'ak malu ona, moris nu'udar feen ho laen no nunka mosu problema to'o agora.

Bazeia ba deklarasaun lezada no arguidu tribunál konklui prosesu no kondena arguidu ho pena prizaun fulan 1 suspende ba tinan 1.

3. Kazu krime omisídiu simples - Nú. Prosesu: 134/pen/2014/TDS*

Kompozisaun Tribunál : Koletivu

* Favor lee JSMP nia pozisaun relasiona ho kazu ne'e iha www.jsmp.tl ; iha parte Komunidade Imprensa JSM_11 Juñu 2015: "Tribunál Distritál Suai ignora privizaun lejitidade defeza ba kazu omisidiu simples no kondena arguidu ho pena prizaun tinan 10."

Juis : Dr. Argentino Luisa Nunes, Dr. Costancio B. Basmerly
no Dr. Alvaro M. Freitas
Ministériu Públiku : Dr. Jose Elo
Defeza : Dr. João H de Carvalho
Konkluzau : Kondena ho pena prizaun tinan 10

Iha 09 Juñu 2015, Tribunál Distritál Suai kondena arguida AS ho pena prizaun tinan 10 hosi tinan 12 ne'ebé ministériu públiku husu maske arguida defende nia aan wainhira komete krime ne'e. Tribunál prova arguida komete krime omisídiu simples hasoru matebian VP iha 13 Dezembru 2010 Suku Debos, Distritu Covalima.

Ministériu Públiku akuza katak iha 13 Dezembru 2010, arguida lori tudik modo sona iha vítima nia kalilin-hun. Aktu ne'e rezulta vítima kanek todan no hala'o tratamentu iha Ospital Referral Suai. Depoisde ne'e transfere fali mai iha Ospital Nasionál Guido Valadares maibé vítima hakotu iis iha dalan klaran. Kazu ne'e akontese tanba vítima ho nia kolega sira atu ba baku/asaltu arguida nia maun maibé lakonsege no buti fali mak arguida nia kakorok, nune'e arguida senti moras no foti tudik hodi sona vítima.

Ministériu Públiku akuza arguida kontra artigu 138 Kódigu Penál kona-ba omisídiu simples ne'ebé ho nia moldura penal hosi tinan 8 to'o tinan 20 prizaun.

Iha alegasaun finál, ministériu públiku husu ba tribunál atu kondena arguida ho pena prizaun tinan 12 tanba komete krime omisídiu simples. Ministériu Públiku mós husu ba tribunál atu la-konsidera deklarasaun arguida nian kona-ba lejítima defeza tanba la prenze rekezitu tuir artigu 44 Kódigu Penál Timor Leste.

Entretantu, defeza husu ba tribunál atu absolve arguida hosi prosesu ne'e tomak tanba arguida sona lezadu tanba halo lejítima defeza.

Tribunál konklui kazu ne'e hodi kondena arguida ho pena prizaun tinan 10 tanba ne'e defeza sei halo rekursu ba kazu refere.

Testemuña SC no CC deklara katak sira nia kna'ar nu'udar infermeiru no sofer ambulánsia. Sira mak lori lezadu hosi Suai mai Dili, maibé iha dalan entre Casa ho Ainaro, lezadu hakotu nia iis no sira la-konsege salva arguidu maske nune'e kontinua lori to'o mai Dili.

Iha alegasaun finál, ministériu públiku husu ba tribunál atu kondena arguida ho pena prizaun tinan 12. Ministériu Públiku mós husu ba tribunál atu la-konsidera deklarasaun arguida nian kona-ba lejítima defeza tanba la prenze rekezitu tuir artigu 44 Kódigu Penál Timor Leste.

Entretantu, defeza husu ba tribunál atu absolve arguida hosi prosesu ne'e tomak tanba arguida komete krime tanba halo lejítima defeza.

Tribunál konklui kazu ne'e hodi kondena arguida ho pena prizaun tinan 10 maske nune'e hosi parte defeza sei halo rekursu ba kazu refere.

4. Kazu krime ameasa - Nú. Prosesu: 60/pen/2015/TDS

Kompozisaun Tribunál : Singulár
Juis : Dr. Benjamin Barros (estajiáriu)
Ministériu Públiku : Dr. Mateus Nessi
Defeza : Dr. Manuel Amaral
Konkluzau : Omologa

Iha 10 Juñu 2015, Tribunál Distritál Suai prezide julgamentu konsiliaun ba kazu krime ameasa ne'ebé involve arguidu VG hasoru JA. Kazu ne'e akontese iha Suai, Distritu Covalima.

Iha prosesu konsiliaun ne'e, arguidu arepende nia hahalok no husu diskulpa ba lezadu no promete katak sei la repete tan nia hahalok ne'e iha futuru. Tanba ne'e lezadu hakarak perdua arguidu no deziste nia keixa.

Bazeia ba akordu hosi parte sira no pedidu dezistensia hosi lezadu, tribunál konklui hodi omologa prosesu ne'e.

Antes ne'e, ministériu públiku akuza arguidu kontra artigu 157 Kódigu Penál kona-ba ameasa ne'ebé defini nia moldura penal entre prizaun ka multa.

5. Kazu krime tentativa omisídiu - Nú. 105/pen/2015/TDS

Kompozisaun Tribunál : Koletivu
Juis : Dr. Costancio B. Basmerly, Dr. Samuel Pacheco(estajiáriu) no Dr. Benjamin Barros (estajiáriu)
Ministériu Públiku : Dr. Jose Elo
Defeza : Dr. João H de Carvalho
Konkluzau : Kondena ho pena prizaun tinan 5

Iha 12 Juñu 2015, Tribunál Distritál Suai hala'o leitura akordaun ba krime tentativa omisídiu ne'ebé involve arguida DFdS hasoru lezadu CN. Kazu ne'e akontese iha 01 Setembru 2014, iha Distritu Bobonaro.

Ministériu Públiku akuza katak iha 01 Setembru 2014, arguida lori katana ida taa dala tolu iha lezadu niaulun, liman kabun no ain-tuur. Hosi akontesementu ne'e rezulta lezadu sofre kanek todan no hala'o tratamentu iha Ospital Referal Maliana no kontinua lori mai iha Ospital Nasionál Guido Valadares Dili no baixa durante semana tolu. Kazu ne'e tanba arguida lakoi atu lezadu ba sisi nia kona-ba deve osan US\$1,000.00 ne'ebé nia impresta.

Ministériu Públiku akuza arguida kontra artigu 23 kona-ba tentativa konjuga ho artigu 138 Kódigu Penál kona-ba omisídiu.

Iha prosesu produsaun ba provas, arguida konfesa totalmente faktus sira ne'ebé ministériu públiku akuza hasoru nia. Enkuantu lezadu kontinua deklara katak loos duni arguida mak lori katana taa iha nia ihaulun, liman kabun no ain-tuur.

Iha alegasaun finál, ministériu públiku husu ba tribunál atu aplika pena tuir artigu 23 kona-ba tentativa konjuga ho artigu 138 Kódigu Penál kona-ba omisídiu ne'ebé antes ne'e nia formula ona iha akuzasaun. Enkuantu, defeza husu ba tribunál atu aplika pena ne'ebé justu no adekuda ba arguida.

Depois avalia faktu sira ne'ebé produz durante julgamentu, tribunál konklui prosesu ne'e, no kondena arguida ho pena prizaun tinan 5.

6. Kazu krime kontrabandu- Nú. Prosesu : 14/pen/2015/TDS

Kompozisaun Tribunál : Koletivu
Juis : Dr. Argentino Luisa Nunes, Dr. Benjamin Barros, no Dr. Alvaro Maria Freitas
Ministériu Públiku : Dr. Mateus Nessi
Defeza : Dr. Manuel Amaral
Konkluzau : Kondena ho pena multa US\$120 no kustu judisiál US\$25.00,-

Iha 16 Juñu 2015, Tribunál Distritál Suai, prezide julgamentu leitura akordaun ba krime kontra bandu ne'ebé involve arguidu LCA hasoru Estadu. Kazu ne'e akontese iha 26 Feveireiru 2014, iha Suai, Distritu Covalima.

Ministériu Públiku akuza katak iha 26 Feveireiru 2014, Polí bsia Sub-distritu Fohorem, Distritu Covalima, kaptura arguidu iha area Wala-Fronteira tanba arguidu laiha surat lisensia hosi Estadu hodi faan kami'i iha fronteira entre Timor Leste ho Indonézia. Polísia konsege sita kami'i saka 22 ho total kg 378. Arguidu deklara atu faan kami'i ne'e ho folin kada kg ida, \$100.00.

Ministériu Públiku akuza arguidu kontra artigu 316 Kódigu Penál kona-ba kontra bandu. Iha julgamentu arguidu konfesa totalmente faktus sira ne'ebé akuza hasoru nia. Mesmu nune'e arguidu deklara katak nia faan kami'i ilegal ne'e atu sustenta nesiedade família uma laran nian.

Iha alegasaun finál, ministériu Públiku husu ba tribunál atu aplika pena tuir artigu 316 alinea 1 Kódigu Penál kona-ba kontra bandu. Enkuantu, defeza husu ba tribunál atu aplika pena suspensaun ba arguidu, tanba nesiedade família uma laran mak obriga nia atu faan kami'i ne'e ba fronteira.

Tribunál konklui kazu ne'e no kondena arguidu ho pena multa US\$120 no kada loron sei selu US\$1.00 durante loron 120 no plus selu kustus judisiál US\$25.00. Wainhira arguidu la kumpri pena multa ne'e alternativamente arguidu sei hetan kastigu iha prizaun durante loron 80.

7. Kazu krime abuzo seksuál ba menór - Nú. Prosesu : 222/pen/2015/TDS

Kompozisaun Tribunál : Koletivu
Juis : Dr. Argentino L. Nunes, Dr. Alvaro Freitas no Dr. Samuel Pacheco (estajiáriu)
Ministériu Públiku : Dr. Jose Elo
Defeza : Dr. Manuel Amaral
Konkluzau : Sei kontinua Prosesu

Iha 07 Maiu 2014, Tribunál Distritál Suai hala'õ julgamentu ba kazu abuzu seksuál ba menór ne'ebé involve arguidu RDN hasoru MDC. Kazu ne'e akontese iha 05 Maiu 2014, iha Suai, Distritu Covalima.

Ministériu Públiku akuza katak iha 05 Maiu 2014, arguidu rasta lezada ba lezada nia kuartu laran aproveita hodi fo osan US\$5.00 no halo abuzu seksuál hasoru lezada. Kazu ne'e akontese wainhira arguidu ba lezada nia uma atu husu plat motor no lezada ho nia maun halimar hela karta. Wainhira lezada nia maun dukur tama toba iha uma laran arguidu aporveita halo abuzu seksuál hasoru lezada.

Ministériu Públiku akuza arguidu kontra artigu 177 alinea (2) Kódigu Penál kona-ba abuzu seksuál ba menõr

Iha julgamentu arguidu nega faktu sira iha akuzasaun no deklarata katak nia la halo abuzu seksuál hasoru lezada no nunca ba lezada sira nia uma.

Enkuantu, lezada kontinua deklarata katak loos duni iha momentu ne'eba arguidu fó nia osan US\$5.00 hodi obriga nia halo relasaun seksuál.

Testemuña AdC deklarata katak arguidu ba duni sira nia uma, no halimar karta no konta istória to'õ AdC, matan dukur, nia tama toba iha kuartu laran. Aktu abuzu seksuál ne'e foin deskobre wainhira testamuña AC fila hosi to'os no hare lezada nia roupa laran mesak ran de'it. Tanba ne'e nia husu ba lezada no lezada hatan ba testamuña katak 'horikalan arguidu mak estraga hau.'

Depois rona tiha testamuña sira nia depoimentu, tribunál marka fali julgamentu tuir mai ba iha 07 Jullu 2015 hodi rona testemuña defeza nian.

8. Kazu krime ofensa ba integridade fizika simples -Nú. Prosesu: 99/pen/2015/TDS

| | |
|----------------------|---------------------------------|
| Kompozisaun Tribunál | : Singular |
| Juis | : Dr. Costancio Barros Basmery |
| Ministériu Públiku | : Dr. Mateus Nessi |
| Defeza | : Dr. João Henrique de Carvalho |
| Konkluzaan | : Adia |

Iha 18 Juñu 2015, Tribunál Distritál Suai adia julgamentu kazu ofensa ba integridade fizika simples ne'ebé involve arguidu SdA hasoru FdAC. Kazu ne'e akontese iha 23 Abril 2014, iha Distritu Ainaro.

Kazu ne'e adia tanba arguidu ho lezadu sira la marka prezensa iha loron julgamentu no tribunál marka fali ba iha 26 Juñu 2015 iha julgamentu movel iha Distritu Ainaro.

9. Kazu krime ofensa ba integridade ba fizika simples ho natureza violénsia doméstika - Nú. Prosesu : 122/pen/2015/TDS

| | |
|----------------------|-------------------------------|
| Kompozisaun Tribunál | : Singulár |
| Juis | : Dr. Costácio Barros Basmery |
| Ministériu Públiku | : Dr. Jose Elo |
| Defeza | : Dr. João H de Carvalho |

Konkluziun : Kondena pena multa US\$135.00 no selu kustu judisiál \$25.00,-

Iha 18 Juñu 2015, Tribunál Distritál Suai, hala'o leitura sentensa ba krime ofensa ba integridade fízika simples ne'ebé involve arguidu DV hasoru nia feen. Kazu ne'e akontese iha 27 Dezembru 2014, iha Distritu Bobonaro.

Ministériu Públiku akuza katak iha 27 Dezembru 2014, arguidu tuku dala 3 iha lezada nia oin sorin karuk rezulta lezada moras no sofre bubu iha lezada nia oin. Kazu ne'e mosu tanba lezada dun arguidu foti nia osan US\$10.00 iha nia kartera laran, nune'e arguidu nervoju hodi baku lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha prosesu julgamentu arguidu konfesa totalmente ba faktus sira iha akuzasaun. Alende ne'e, lezada mós kontinua konfirma faktu sira ne'e, no deklara katak nia perdua ona arguidu, lezada mós deklara katak sira hela hamutuk ona nu'udar feen ho laen hanesan bai-bain no nunca mosu tan problema to'o agora.

Iha alegasaun finál, ministériu Públiku husu ba tribunál atu aplika pena prizaun fulan 3 no suspende ba tinan 1 ba arguidu, tanba provadu prátika violénsia hasoru nia feen.

Enkuantu, defeza husu ba tribunál atu aplika pena ne'ebé justu no adekuada ba arguidu no husu mós ba tribunál atu tetu sirkunstansia hotu tanba arguidu ho lezada di'ak malu ona no sira kontinua hela hamutuk nu'udar feen ho laen nomos nunca mosu tan problema to'o agora.

Rona tiha alegasaun, tribunál konklui prosesu ne'e no kondena arguidu ho pena multa US\$135.00 no kada loron arguidu tenke selu US\$1,50 sentavus durante loron 90. Tribunál mós kondena arguidu selu kustu judisiál US\$25.00 no wainhira la selu arguidu sei hetan kastigu loron 60 iha prizaun.-

10. Kazu krime ofensa ba integridade ba fízika simples ho natureza violénsia doméstika - Nú. Prosesu : 64/pen/2015/TDS

Kompozisaun Tribunál : Singulár
Juis : Dr. Costáncio Barros Basmery
Ministériu Públiku : Dr. Jose Elo
Defeza : Dr. João Henrique de Carvalho
Konkluziun : Kondena pena prizaun fulan 6 suspende ba tinan 1 fulan 6 no selu kustas US\$20.00

Iha 18 Juñu 2015, Tribunál Distritál Suai, prezide julgamentu leitura sentensa ba krime ofensa ba integridade fízika simples ne'ebé involve arguidu SG hasoru nia feen. Kazu ne'e akontese iha 08 Outubru 2014, iha Casa, Distritu Ainaro.

Ministériu Públiku akuza katak iha 08 Outubru 2014, arguidu tuku no tebe dala barak iha lezada nia kotuk laran no isin lolon no kontinua tuku iha lezada nia ulun, ren-toos. Aktu hirak ne'e rezulta lezada sofre moras, bubu no ran to'o halo tratamentu iha ospital. Motivu hosi akontesementu ne'e tanba arguidu diskonfia lezada simu telefone no ko'alia ho mane seluk.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 alinea (b) Lei Kontra Violénsia Doméstika.

Iha tribunál, arguidu rekoñese faktus sira hotu ne'ebé akuza hasoru nia. Nune'e mós lezada kontinua konfirma faktu sira ne'e, maibé deklarara katak nia perdua ona arguidu. Lezada mós dehan sira hela hamutuk ona nu'udar feen ho laen no to'o agora nunka mosu tan problema.

Iha alegasaun final, ministériu públiku husu ba tribunál atu aplika pena prizaun fulan 6 suspende ba tinan 1 ba arguidu, tanba provadu prátika violénsia hasoru nia feen.

Enkuantu, defeza husu ba tribunál atu aplika pena ne'ebé justu no adakuada ba arguidu tanba arguidu no lezada di'ak malu ona no sira kontinua hela hamutuk nu'udar feen ho laen nomos nunka mosu problema to'o agora.

Bazeia ba faktu provadu sira no alegasaun final hosi parte sira, tribunál konklui prosesu ne'e no kondena arguidu ho pena prizaun fulan 6 suspende ba tinan 1 fulan 6 no selu kustas judisiál US\$20.00.-

11. Kazu krime ofensa ba integridade ba física simples ho natureza violénsia doméstika - Nú. Prosesu : 124/pen/2015/TDS

| | |
|----------------------|---|
| Kompozisaun Tribunál | : Singulár |
| Juis | : Dr. Costáncio Barros Basmerly |
| Ministériu Públiku | : Dr. Jose Elo |
| Defeza | : Dr. João H de Carvalho |
| Konkluzau | : Kondena ho pena prizaun fulan 3 suspende ba tinan 1 |

Iha 18 Juñu 2015, Tribunál Distritál Suai, prezide leitura sentensa ba krime ofensa ba integridade física simples ne'ebé involve arguidu AVdJ hasoru nia feen. Kazu ne'e akontese iha 30 Setembru 2014, iha Distritu Bobonaro.

Ministériu Públiku akuza katak iha 30 Setembru 2014, arguidu tebe dala ida iha lezada nia liman karuk no rezulta lezada sente moras, bubu no naksalak iha liman nia fuan. Motivu hosi akontesimentu ne'e tanba arguidu lakoi lezada ba halimar ho nia família sira iha Bobonaro.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 alinea (b) Lei Kontra Violénsia Doméstika.

Iha julgamentu arguidu konfesa totalmente faktus sira hosi akuzasaun ministériu públiku. Aleinde ne'e, lezada mós kontinua reforsa faktu sira ne'ebé ministériu públiku akuza ba arguidu. Mesmu

nune'e, lezada mós deklara katak nia perdua ona arguidu, no to'ogora sira hela hamutuk nu'udar feen ho laen hanesan bai-bain no nunka mosu tan problema.

Iha alegasaun finál, ministériu públiku husu ba tribunál atu aplika pena prizaun fulan 6 suspende ba tinan 1, tanba arguidu provadu prátika ofensa integridade fizika simples hasoru nia feen inklui bandu nia feen atu lebele vizita ba nia família sira.

Enkuantu, defeza husu ba tribunál atu aplika pena ne'ebé justu no adekuada ba arguidu tanba arguidu arepende nia hahalok, di'ak malu ona ho nia feen no nunka mosu problema to'ogora.

Depios rona no avalia faktu no alegasaun final hosi parte sira, tribunál konklui prosesu ne'e no kondena arguidu ho pena prizaun fulan 3 suspende ba tinan 1.

12. Kazu krime ofensa ba integridade ba física simples ho natureza violénsia doméstika - Nú. Prosesu : 113/pen/2015/TDS

| | |
|----------------------|---|
| Kompozisaun Tribunál | : Singulár |
| Juis | : Dr. Costácio Barros Basmerly |
| Ministériu Públiku | : Dr. Jose Elo |
| Defeza | : Dr. João H de Carvalho |
| Konkluzau | : Kondena ho pena prizaun fualn 6 suspende ba tinan 1 |

Iha 18 Juñu 2015, Tribunál Distritál Suai, prezide leitura sentensa ba krime ofensa ba integridade física simples ne'ebé involve arguidu FdC hasoru nia feen. Kazu ne'e akontese iha 11 Feveireiru 2014, iha Same, Distritu Manufahi.

Ministériu Públiku akuza katak iha 11 Feveireiru 2014, arguidu tuku dala rua iha lezada nia matan fukun loos no rezulta lezada sofre moras no bubu metan iha lezada nia matan fukun. Motivu hosi akontesementu ne'e tanba arguidu lakoi atu lezada haruka nia ba hare bibi oan ne'ebé nia tali kotu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 alinea (b) Lei Kontra Violénsia Doméstika.

Iha julgamentu arguidu konfesa totalmente ba faktus sira hosi akuzasaun ministériu públiku. Nune'e mós lezada kontinua konfirma faktu sira ne'ebé ministériu públiku akuza ba arguidu. Mesmu nune'e, lezada mós deklara katak nia perdua ona arguidu, sira hela hamutuk nu'udar feen ho laen hanesan bai-bain no nunka mosu tan problema deposite akontesementu ne'e.

Iha alegasaun finál, ministériu públiku husu ba tribunál atu aplika pena tuir artigu 145 Kódigu Penál kona-ba ofensa ba integridade física simples.

Enkuantu, defeza husu ba tribunál atu aplika pena suspensaun ba arguidu tanba arguidu no lezada di'ak malu ona no sira kontinua hela hamutuk nu'udar feen ho laen nomos nunka mosu problema to'ogora.

Bazeia prosesu hirak ne'ebé asosiadu ho kazu ne'e, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

13 . Kazu krime dano simples no ameasa - Nú. Prosesu: 116/pen/2015/TDS

Kompozisaun Tribunál : Singulár
Juis : Dr. Costáncio Barros Basmery
Ministériu Públiku : Dr. Jose Elo
Defeza : Dr. João H de Carvalho
Konkluzau : Omologa

Iha 18 Juñu 2015, Tribunál Distritál Suai prezide julgamentu konsiliaun ba kazu krime danu simples no ameasa ne'ebé involve arguidu IA hasoru PS. Kazu ne'e akontese iha Suai, Distritu Covalima.

Iha tribunál, arguidu husu diskulpa ba lezadu no promete katak nia sei la halo tan iha futuru. Lezadu mós konsidera arguidu nia pedidu deskulpa no hakarak perdua arguidu nomós deside atu dada fali keixa ne'e.

Bazeia ba akordu no pedidu dezistensia hosi parte sira, tribunál konklui kazu ne'e omologa prosesu ne'e.

14. Kazu krime ofensa ba integridade fizika simples -Nú. Prosesu: 138/pen/2015/TDS

Kompozisaun Tribunál : Singular
Juis : Dr. Costáncio Barros Basmery
Ministériu Públiku : Dr. Jose Elo
Defeza : Dr. Manuel Amaral
Konkluzau : Omologa

Iha 30 Juñu 2015, Tribunál Distritál Suai prezide julgamentu konsiliaun ba kazu ofensa ba integridade fizika simples ne'ebé involve arguidu AB hasoru MAM. Kazu ne'e akontese iha Distritu Covalima.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

Iha prosesu konsiliaun ne'e, arguidu konfesa faktu sira iha akuzasaun no husu diskulpa ba lezada no promote katak sei la repete iha futuru. Tanba ne'e lezada perdua arguidu no husu ba tribunál atu deziste tiha prosesu ne'e.

Bazeia ba akordu no pedidu dezistensia hosi parte sira, tribunál konklui kazu ne'e no omologa prosesu ne'e.

15. Kazu krime koasaun seksuál- Nú. Prosesu: 95/pen/2015/TDS

Kompozisaun Tribunál : Koletivu
Juis : Dr. Costancio B. Basmery, Dr. Alvaro M. Freitas, Dr. Argentino Luisa Nunes

Ministériu Públiku : Dr. Mateus Nessi
Defeza : Dr. Manuel Amaral
Konkluzau : Sei kontinua Prosesu

Iha 30 Juñu2015, Tribunál Distritál Suai prezide julgamentu ba kazu krime koasun seksuál ne'ebé involve arguidu JLML hasoru PFS. Kazu ne'e akontese iha 11 Agostu 2014, iha Distritu Bobonaro.

Ministériu Públiku akuza katak iha 11 Agosto 2014, arguidu bolu lezada no lori lezada ba iha kuartu laran no taka odamatan, amesa no aproveita rei lezada dala haat iha lezada nia hasan no inus no buti lezada nia susun. Arguidu mós amesa atu oho sei karik lezada fila ba uma no hatete ba nia inan, aman ho fam'ilia sira. Kazu ne'e akontese wainhira lezada fila hosi konsulta nia moras iha ospital Maliana atu ba uma.

Iha 26 Outobru 2014, arguidu kontinua prátika hanesan hasoru lezada iha lezada nia uma. Iha momentu ne'eba lezada mesak de'it ho nia alin nain rua ne'ebé sei ki'ik. Arguidu dehan ba lezada nia alin atu lori labarik sai ba iha liur. Depois ida ne'e arguidu taka odamatan hodi dada lezada no hasai lezada nia kalsa no roupa sira seluk no buti lezada nia susun no hasai nia kalsa no halo abuzu seksuál ba lezada.

Iha 16 Novembru 2014 arguidu kontinua tenta atu halo tan koasaun seksuál hasoru lezada maibé lakonsege tanba lezada halai sai hosi uma hodi ba subar iha nia inan boot nia uma. Kazu ne'e akontese wainhira arguidu hare lezada nonton hela televizaun iha sira nia uma laran. Iha momentu ne'eba arguidu tama hosi odamatan kotuk atu halo asaltu ba lezada maibé lakonsege tanba lezada halai subar.

Iha prosesu julgamentu arguidu konfesa totalmente ba faktus sira no arepende ba nia hahalok. Aleinde ne'e, lezada mós kontinua mantein faktu sira ne'e iha tribunál.

Enkuantu DFS nu'udar testemuña deklara katak, 26 Outubru 2014, nia hare arguidu ba iha sira nia uma no arguidu haruka nia kous nia alin sai ba iha liur, maibé testamuña dehan nia lahare ho matan kona-ba arguidu halo koasaun seksuál hasoru lezada.

Iha julgamentu ne'e, tribunál kontinua rona tan AFS nu'udar testemuña segundu no deklara katak nia lahatene no lahare kona-ba akontesimentu ne'e. Testamuña dehan nia rona tutan fali istória akontesementu ne'e hosi lezada. Testemuña deklara katak, lezada konta istória ne'e ba nia depois sira ba hato'o keixa iha Polísia.

Iha parte seluk, defeza la-konsege apresenta nia testemuña no argumenta katak sei hare de'it dokumentus ne'ebé junta iha prosesu no autus nian.

Iha alegasaun finál, ministériu Públiku husu ba tribunál atu aplika pena tuir artigu 171- kona-ba koasaun seksuál konjuga ho artigu 173 Kódigu Penál kona-ba agravaun.

Enkuantu, defeza husu ba tribunál atu absolve arguidu hosi prosesu ne'e tomak tanba provas ne'ebé ministériu públiku uza hodi akuza arguidu la prene rekeztus ba koasaun seksuál.

Depoisde rona tiha alegasaun hosi ministériu públiku no defeza, tribunál marka fali julgamentu ba leitura akordaun iha 15 Jullu 2015 iha tuku 10.00 dadersan.

Atu hetan informasaun kle'an favor kontaktu direitamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

telefone: 3323883/77295795

webiste: www.jsmp.tl

facebook www.facebook.com/timorleste.jsmp

twitter: @JSMPtl